

輿地廣記卷第三十三

夔州路

都督府夔州春秋爲庸國之魚邑文十六年楚侵庸七遇皆北
唯裨僚魚人實逐之是也庸滅屬巴秦及二漢屬巴南二郡初
平六年分屬永寧郡建安六年劉璋改爲巴東郡蜀晉宋齊皆
因之齊兼立巴州梁曰信州後周立總管府隋開皇初郡廢大
業初府廢復置巴東郡唐武德元年曰信州二年改曰夔州天
寶元年曰雲安郡蜀王氏升鎮江軍節度後改曰寧江今縣二
中奉節縣故魚邑二漢爲魚復縣屬巴郡蜀屬巴東郡劉備改
縣曰永安晉太康元年復舊齊立巴川西魏改縣曰人復隋
曰信州唐曰夔州正觀二十三年縣更今名有三峽山白鹽
山赤甲山太灤水灤預堆有魚復縣故城在縣北今名赤甲
城有古扞關楚肅王所作以拒巴蜀有白帝城公孫述所築
有故永安宮劉備所置備終諸葛亮受遺詔於此有諸葛亮
八陣圖累石爲之

地三十三

夔州路

一

中下巫山縣故楚之巫郡秦昭王伐楚取之以爲縣屬南郡二
漢因之晉立建平郡宋齊梁西魏後周皆因之隋開皇初郡
廢屬信州曰巫山唐屬夔州有巫山及高都山昔楚襄王遊
高唐晝寢夢一婦人曰妾居巫山之陽高丘之岨旦爲朝雲
暮行雨朝朝暮暮陽臺之下覺而命宋玉賦之此其地也有
大江

下黔州春秋爲巴地戰國楚威王使莊躋將兵循江上略巴黔
中以西屬楚秦昭王伐楚取黔中以屬黔中郡二漢屬武陵郡
晉宋齊皆因之後不賓服後周武帝時蠻帥以其地歸附初立
奉州後改曰黔州不帶縣隋爲黔安郡唐武德元年曰黔州天
寶元年曰黔中郡蜀王氏升武泰軍節度今縣二

中彭水縣漢西陽縣地隋開皇十三年置以爲州治洪杜寨本
洪杜縣唐武德二年析彭水置 皇朝嘉祐八年省洋水
鎮本洋水縣唐武德二年析彭水置曰盈隆先天元年曰盈
川天寶元年更今名 皇朝嘉祐八年省爲寨熙寧二年
爲鎮信寧鎮本信安縣隋置唐武德二年更名屬義州正觀
十一年來屬 皇朝嘉祐八年省都濡鎮本都濡縣唐正
觀二十年析盈隆置 皇朝嘉祐八年省有三嵎山洪杜
山伏牛山巴江洋水

中黔江縣本石城唐武德元年析彭水縣置天寶元年更名有
羽人山河蓬水

上達州春秋戰國爲巴地秦二漢屬巴郡建安中分屬巴西郡
蜀晉因之宋立巴渠郡齊因之梁立萬州以萬頃池爲名及改
郡爲東關西魏改州曰通州後周因之隋開皇初郡廢大業初

地三十三

夔州路

二

州廢立通川郡唐武德元年曰通州天寶元年曰通川郡蜀王
氏孟氏因之 皇朝乾德三年更名今縣五

中通川縣本宕渠縣地東漢置宣漢縣屬巴郡蜀劉氏分屬宕
渠郡晉省之屬巴西宋復置及立巴渠郡梁置石城縣立萬
州及東關郡西魏曰通州隋改石城縣曰通川置通川郡唐
因之 皇朝爲達州有鳳凰山有巴江渠江合於縣東南
中巴渠縣宋巴渠縣地唐永泰元年析石鼓置大和三年屬開
州四年來屬有鹿子山渠江

下永睦縣本永康梁置又有南榮郡隋開皇初郡廢屬巴州十
八年縣更名唐武德二年立萬州正觀元年州廢來屬有龍
驤山巴江

下新寧縣唐武德二年析通川置大和三年屬開州後復來屬
有濁水山新寧溪故閬英縣唐天寶九載置 皇朝乾德

五年省入石鼓縣西魏置及立遷州後周廢州立臨清郡隋開皇初郡廢屬通州唐寶曆元年省大中元年復置故三岡縣梁置屬新安郡西魏改郡曰新寧隋開皇初郡廢屬通州唐寶曆元年省大中五年復 皇朝熙寧六年省三岡七年省石鼓分屬通川永睦新寧

下東鄉縣本宋下蒲縣地屬巴渠郡後改爲東鄉西魏立石州後周廢州立三巴郡隋開皇初郡廢屬通州唐武德三年立南石州又置下蒲縣八年州廢省下蒲入焉故宣漢縣本宋東關縣地屬巴渠郡後改爲宣漢西魏立井州及永昌郡隋開皇三年郡廢五年州廢屬通州唐武德元年立南井州及置東關縣正觀元年州廢省東關以宣漢來屬 皇朝乾德五年省入東鄉有下蒲江

通明院本唐宣漢縣地僞蜀置通明院以催科稅賦 皇朝因

地三十三

夔州路

三

之有宣漢鹽井地名長腰鹹源在大江龍骨石窟中涌出

中下施州春秋爲巴地戰國屬楚秦二漢屬南郡吳晉宋齊梁屬建平郡後周立施業二州及清江軍屯二郡隋開皇初郡廢大業初州廢爲清江郡義寧二年復施業二州唐正觀八年廢業州併焉天寶元年曰清化郡後復故二蜀因之今縣二

中下清江縣漢巫縣地屬南郡吳置沙渠縣屬建平郡晉因之後省後周立施州及清江郡隋開皇初郡廢五年置清江縣大業初州廢屬清江郡義寧二年立施州爲州治焉有施王屯餘址故以爲名有連珠山夷水以其水色清照十丈分沙故曰清江水出縣西東至宜都入大江

中下建始縣後周立業州及軍屯郡隋開皇初郡廢五年置建始縣大業初州廢屬清江郡義寧二年立業州正觀八年州廢來屬有連天山建始溪

下忠州春秋戰國爲巴地秦屬巴郡二漢蜀晉宋齊皆因之梁立臨江郡後周兼立臨州隋開皇初郡廢大業初州廢屬巴東郡義寧二年復立臨州唐正觀八年改曰忠州天寶元年曰南賓郡前蜀後蜀因之今縣四

中下臨江縣漢以後屬巴郡梁立臨江郡後周立臨州唐曰忠州有屏風山大江

中下墊江縣西魏析臨江置及立容川容山二郡後周改縣曰魏安隋開皇初郡廢屬渠州十八年復故名唐武德元年屬潯州八年來屬故桂溪縣本清水唐武德二年析臨江置天寶元年更名 皇朝熙寧五年省入

下豐都縣本平都故巴子之別都也漢枳縣地隋義寧二年析臨江復置屬臨州唐屬忠州有平都山大江

下南賓縣唐武德二年析武寧置有望塗溪南賓縣尉司州東

地三十三

夔州路

四

南一百八十里本夔州龍渠鎮 皇朝乾德六年來屬開寶二年置尉司

下萬州春秋戰國爲巴地秦二漢屬巴郡建安中分屬巴東郡晉宋齊皆因之後周立安鄉南都二郡兼立南州後改安鄉曰萬州南都曰懷德隋州郡並廢屬巴東郡唐武德二年立南浦州八年州廢屬夔州九年復立曰浦州正觀八年曰萬州天寶元年曰南浦郡前蜀後蜀因之今縣二

中下南浦縣本羊渠蜀建興八年更名屬巴東郡晉宋齊因之後周立安鄉郡後改郡曰萬川縣曰安鄉隋開皇初郡廢十八年改縣曰南浦屬巴東郡唐武德二年立南浦州八年州廢屬夔州九年復爲萬州治焉有高粱山大江

下武寧縣本漢臨江縣地後周置源陽縣及立南州南都後改郡曰懷德縣曰武寧隋屬巴東郡唐武德二年屬南浦州八

年州廢屬臨州九年復來屬有木厯山大江

下開州春秋戰國爲巴地秦二漢屬巴郡晉宋齊梁屬巴東郡西魏置開州及萬安江會二郡後周置周安萬世二郡省江會入周安隋開皇初郡並廢大業初州廢分屬通川巴東二郡義寧二年析置萬世郡唐武德元年曰開州天寶元年曰盛山郡前蜀後蜀因之今縣二

上開江縣本漢豐宋置屬巴東郡西魏改曰永寧隋開皇末改曰盛山屬巴東郡唐立開州廣德元年縣更名故西流縣本後魏置漢興縣西魏更名立開州及萬安江會二郡後周廢江會入周安隋開皇初萬安郡廢大業初州廢屬通川郡義寧二年來屬唐正觀元年省入故新浦縣宋置屬巴東郡後周立周安郡隋開皇初郡廢屬巴東義寧二年來屬唐因之皇朝慶厯四年省入有盛山疊江

地三十三

夔州路

五

中清水縣本萬世後周置及立萬世郡隋開皇初郡廢屬通川郡義寧二年來屬唐正觀二十三年更名萬歲寶厯元年省尋復 皇朝改曰清水有石門山清水東南五里有靈洞唐正元九年雷雨震開

下涪州春秋戰國爲巴地秦二漢屬巴郡建安二十一年蜀分立涪陵郡晉因之後廢而復立隋開皇初又廢屬渝州唐武德元年析置涪州天寶元年曰涪陵郡前蜀後蜀因之今縣三下涪陵縣漢舊縣東漢及晉因之後改曰漢平置涪陵郡隋開皇初郡廢屬渝州十八年改曰涪陵後廢爲鎮唐武德元年以鎮立涪州二年置涪陵縣温山鎮本温山縣唐置屬南潞州後來屬 皇朝熙寧三年省入有鷄鳴峽山大江黃石灘一名橫石東漢岑彭破公孫述將侯丹於黃石卽此內江卽黔江也南通黔中昔秦使司馬錯泝此水南上擊奪楚黔

中地

下樂溫縣唐武德二年析巴縣置屬南潏州又析巴縣涪陵置永安縣九年樂溫來屬開元二十一年省永安入焉有樂溫山

下武龍縣唐武德二年置有武龍山

下恭州古巴子之都戰國爲秦所併立巴郡二漢因之初平六年分巴爲二郡以江州爲永寧郡建安六年復爲巴郡蜀晉宋齊因之梁兼立楚州西魏後周因之隋開皇初郡廢改州曰渝州大業初州廢爲巴郡唐武德元年曰渝州天寶元年曰南平郡蜀王氏孟氏因之 皇朝崇寧元年更名今縣三

中巴縣本江州古巴國地周武王封同姓爲巴子七國時與蜀俱稱王秦惠王旣滅蜀國因使張儀虜巴王而取其地以立巴郡二漢因之建安中劉璋使嚴顏爲太守張飛攻陷之蜀以後皆爲巴郡而改江州爲巴縣梁曰楚州隋唐曰渝州皇朝曰恭州有縉雲山明月峽大江

地三十三

夔州路

六

中下江津縣本漢江州縣地後旣改江州爲巴縣乃於此別置江州西魏改曰江陽立七門郡隋開皇初郡廢屬渝州十八年曰江津唐因之故萬壽縣本萬春唐武德三年析江津置五年更名 皇朝乾德三年省故南平縣唐置屬霸州正觀十三年州廢來屬 皇朝雍熙五年省入江津

下璧山縣唐至德二載析巴江津萬壽置有重璧山油溪

珍州古蠻夷之地二漢晉隋屬牂柯郡唐屬珍州元和三年州廢屬溱州後復屬西高州唐衰棄之 皇朝大觀二年大駱

解上下族帥駱世華駱文貴等獻地東西四百五里南北三百五十一里以立珍州亦曰樂源郡今縣一

中樂源縣唐正觀十六年置屬珍州後廢 皇朝大觀二年

立珍州復置樂源爲州治焉

承州春秋戰國及秦爲蠻夷地二漢晉屬牂柯郡通代恃險不聞臣服隋煬帝時屬明陽郡兼屬黔安唐武德四年立夷州正觀元年州廢四年復置天寶元年曰義泉郡唐衰棄之

皇朝大觀三年蕨平帥任漢崇等獻地東西三百五十九里南北六百六十五里改爲承州今縣五

綏陽縣隋末置屬明陽郡唐武德二年屬義州正觀十一年來屬而自都上徙州治焉有綏陽山

都上縣唐武德元年析彭水置屬黔州正觀四年立夷州十一年州徙治綏陽義泉縣隋末置屬明陽郡唐武德二年屬義州五年屬智州正觀十一年屬牢州州自信安徙治焉十六年州廢來屬

洋川縣唐武德二年置屬義州正觀十六年州廢來屬

地三十三

夔州路

七

寧夷縣隋末置唐初屬思州武德四年立夷州正觀元年州廢屬務州開元二十五年來屬自都上以下四縣故基荒廢不可考驗 皇朝收復但據夷人所指以置縣然原其始析置移屬則都上當近黔州寧夷當近思州也

溱州古蠻夷地自漢至隋屬牂柯郡唐正觀十六年開山洞立溱州天寶元年曰溱溪郡唐衰棄之 皇朝熙寧七年招收

置榮懿寨屬南平軍崇寧中復立溱州舊縣二

中榮懿縣唐正觀十六年置爲州治後廢 皇朝以爲榮懿

寨隸南川縣唐又置樂末縣咸亨元年省

中下扶歡縣唐正觀十六年置

梁山軍 皇朝開寶三年以石氏屯田務立軍今縣一

中下梁山縣西魏析胸臆置隋屬巴東郡唐武德二年屬南浦州八年州廢屬夔州是年復立浦州又來屬後改爲萬州

皇朝開寶三年立軍以爲治焉有柏枝山高梁水紆溪

同下州南平軍春秋戰國爲巴地秦屬巴郡二漢晉宋齊因之後爲蠻夷所據唐武德二年開南蠻立南州二年改曰夔州四年復曰南州天寶元年曰南川郡唐衰棄之皇朝熙寧七年招收西南蕃部立南平軍今縣二

中下南川縣本隆陽唐武德二年置爲南州治先天元年更名唐末廢皇朝皇祐五年復置屬渝州熙寧七年以縣之銅佛坦立南平軍而省南川爲鎮入隆化元豐元年復置有松山得勝山七渡水

中隆化縣唐正觀十一年置屬涪州先天元年改爲賓化後復故名皇朝熙寧七年來屬有永隆山羅緣溪夔溪胡陽溪

同下州遵義軍歷代地理與播州同皇朝大觀二年蕃帥

地三十三

夔州路

八

楊文貴獻地東西二百二十二里南北六百一十二里置遵義軍今縣一

遵義縣漢且蘭縣地屬牂柯郡唐正觀元年析牂柯置屬郎州十一年州廢縣亦省十三年復立播州亦復置縣十四年更名羅蒙十六年更名遵義後自播川徙州治焉唐衰播州爲楊氏兩族所分據一居播川一居遵義以仁江水爲界其後居播川者曰光榮得唐所給州銅牌居遵義者曰文貴得州銅印皇朝大觀二年兩族各獻其地皆自以爲播州議者以光榮爲族長重違其意乃以播川立州遵義立軍焉同下州大寧監自五代以前地理與夔州同皇朝開寶六年立監今縣一

中下大昌縣本泰昌晉太康初分秭歸置屬建平郡宋齊因之後周避文帝名改曰建昌而立永昌郡尋廢又改縣曰大昌

隋屬巴東郡唐屬夔州 皇朝以縣之鹽泉所置大寧監
端拱元年來屬爲監治焉故比井縣晉屬建平郡宋齊梁因
之後周省入有巫溪鹹泉

夔州路化外州

下費州古蠻夷地二漢晉宋屬牂柯郡山川險阻爲俚獠所居
多不賓附至後周始置爲費州以費水爲名後廢隋屬黔安郡
唐武德初屬思州正觀四年立費州天寶元年曰涪川郡領縣
四

中下涪川縣隋開皇五年置屬黔安郡後廢唐武德四年析務
川置屬思州正觀四年立費州爲州治

中下扶陽縣隋仁壽四年置屬巴東郡唐武德四年屬思州正
觀四年來屬

中下多田縣唐武德四年置屬思州正觀八年來屬

地三十三

夔州路化外州

九

中下城樂縣唐武德四年置屬思州正觀八年來屬

下西高州春秋爲蠻夷地戰國秦漢爲夜郎國元鼎六年開夜
郎屬牂柯郡東漢蜀晉宋因之其後不屬唐正觀十六年開山
洞立珍州天寶元年曰夜郎郡元和三年州廢屬溱州後復立
西高州領縣四內樂源已先歸附別立珍州

中下夜郎縣本漢夜郎國有豚東南至廣鬱爲鬱水又東南至
番禺城下入海所謂牂柯江也武帝伐南越唐蒙言夜郎精
兵可得十萬浮船牂柯出不意此制越一奇也上乃使蒙從
巴符關入見夜郎侯約爲置吏及以爲犍爲郡後且蘭反殺
犍爲太守漢滅且蘭立牂柯郡而犍爲郡徙治犍道焉夜郎
侯入朝上以爲夜郎王至成帝時夜郎王興與鉤町漏卧更
舉兵相攻牂柯太守陳立諭告興不從命立出行縣至興國
且同亭召興入見立數責因斬之以其地爲縣屬牂柯郡東

漢以後因之後廢唐正觀十六年開山洞置夜郎縣爲珍州
治李白流夜郎卽此元和三年州廢屬溱州後復立曰西高
州

中下麗高縣或作麗臯唐正觀十六年置

中下榮德縣唐末置

輿地廣記卷第三十三

地三十三

夔州路化外州

十